

## **Baruwa ya Paulo yoandikira AFILIPi Tanga mbere**

Paulo waandika baruwa hino wakati kala a jela, kuashukuru afuasi a Jesu hiko Filipi kpwa kumtetya na kumvoyera. Anatumaini kutuluzwa jela ili aenderere kutangaza habari nono kuhusu Jesu, ela piya anamanya anaweza kuolagbwa. Baruwa hino Paulo anaandika kala ana raha sana. Hata dzagbwe a jela, ela ana raha mana wadzifundza siri ya kudzibaza kutosheka na hali zosi. Tsona anatambukira mbazi zosi arizohenderwa ni afuasi a hiko Filipi.

Paulo anaonya afuasi ayae kala inawezekana nao piya akagaya. Mana Mlungu anaapha nafwasi ya kumkuluphira Jesu na piya kugayiswa dza vivyo arivyogayiswa, kpwa sababu ya kumkuluphira.

Hinyo afuasi a Jesu hiko Filipi kala ana tabu, kpwa sababu atu anjina kala ana-fundza handzo. Kala anaamba ni lazima atu alunge Shariya za Musa au taandakubaliwa ni Mlungu. Ela Paulo anaatambukiza kukala atu a Mlungu a kpweli ni hara anaomuabudu kpwa msada wa Rohowe (3:3).

### **Maelezo muhimu kpwa chifupi**

Shukurani na mavoyo 1:1-11

Paulo ana raha mana habari nono kuhusu  
Jesu zinatangazwa 1:12-30

Kalani apole dza Jesu 2:1-18

Paulo anapanga kuahuma Timothi na Epafrodito 2:19-30

Kumanya Jesu ni muhimu kuriko gosi 3:1—4:1

Paulo anaatiya moyo afuasi a Jesu hiko Filipi 4:2-20

Salamu 4:21-23

<sup>1</sup> Salamu hizi zila kpwangu mimi Paulo na myangu Timothi, atumishi a Jesu Muokoli.

Hunakulamusani mwimwi atakatifu a Mlungu mosi mkalao mudzi wa Filipi. Nakuandikirani mwimwi afuasi mosi a Masihi Jesu phamwenga na vilongozi enu na asaidizi ao.

<sup>2</sup> Baba Mlungu na Bwana Jesu Masihi naaku-jaliyeni na mkale salama.

### *Shukurani na mavoyo*

<sup>3</sup> Namshukuru Mlungu wakati wosi nchiku-fikiriyani. <sup>4</sup> Nami naona raha mwangu moyoni, chila wakati nchikala nakuvoyerani.

<sup>5</sup> Mana mwagbwirana nami kutangaza habari nono kuhusu Jesu Muokoli, hangu siku ya mwandzo mriphomkuluphira hadi sambi.

<sup>6</sup> Mlungu waandza kazi nono mwenu mioyoni. Nami nina hakika andaenderera nayo hadi Jesu Muokoli achiuya akale akaimala kabisa. <sup>7</sup> Nakumendzani sana, ndio mana chila nihendaro nakufikiriyani mwangu moyoni. Hino ni sawa kpwa mana Mlungu wahujaliya kuhenda kazi phamwenga ambayo wahupha. Mwimwi mosi mwaniterya kutangaza habari nono kuhusu Jesu, na kuahakikishira atu

kukala ni za kpweli, hata hivi nrivyo jela. <sup>8</sup> Mlungu anamanya nagomba kpweli: naaza sana kukala namwi, na mendzwa yangu ila moyoni mwa Jesu Muokoli. <sup>9</sup> Nakuvoyerani mzidi kumendzana, mmanyeto Mlungu na muweze kuelewa tafwauti ya sawa na makosa. <sup>10</sup> Kpwa njira iyo mundaweza kutsambula kuhenda ra sawa, ili mkale bila ya makosa wala lawama hadi Jesu ndiphouya. <sup>11</sup> Piya mkale na maisha ga haki na tabiya nono kpwa uwezo wa Jesu Masihi. Atu achiona hivi andamtogola Mlungu na kuona utukufuwe.

*Paulo ana raha mana habari nono kuhusu Jesu zinatangazwa*

<sup>12</sup> Enehu, nalonda mmanyeye kukala higo garigoniphaha gaterya sana kueneza habari nono kuhusu Jesu Muokoli. <sup>13</sup> Matokeoge nkukala asikari osi arindao dzumba ra mfalume na atu anjina osi anamanya kala nafungbwa jela kpwa sababu ya kumuhumikira Jesu. <sup>14</sup> Kufungbwa kpwangu kukaahenda afuasi anji a Jesu azidi kumkuluphira, na anainjira nguvu zaidi kutangaza chilume ujumbe wa Mlungu.

<sup>15</sup> Ni kpweli atu anjina anahubiri habari za Jesu na chidzitso, hinyo ni apindzani, mana analonda aphahe afuasi anji kuriko mimi. Ela anjina anahubiri moyo kutsuka. <sup>16</sup> Hinyo ahubirio na nia nono anahenda hivyo kpwa kunimendza, kpwa vira anamanya kala Mlungu wanihuma hipha ili nikanire habari

nono kuhusu Jesu. <sup>17</sup> Na ahubirio kuhusu Jesu Masihi na lengo ra kunipinga, taahenda hivyo moyo kutsuka. Anaona andanienjereza era mashaka hivi nrivyo jela. <sup>18</sup> Ela si chitu! Akale anahubiri na nia nono hebu mbii, kpwangu mino ni sawa, nahamirwa kukala Jesu anahubiriwa. Phahi kpwa sababu iyo nindazidi kuhamirwa. <sup>19</sup> Mana namanya munanivoyera na Roho wa Jesu Masihi andaniterya na mwisho nindatuluzwa jela.

*Lengo ra maisha ga  
Paulo ni kumuhumikira Jesu*

<sup>20</sup> Naaza sana na kutumaini nisishindwe nkaphaha waibu. Kula kare sitishirwa ni chitu chochosi. Hata sambu naaza vivi nrivyo vimtogole Jesu, nchikala mzima au nchio-lagbwa. <sup>21</sup> Kpwangu mino mana ga kuishi ni kumuhumikira Jesu na kufwa ni fwaida zaidi. <sup>22</sup> Ichikala ni nienderere kuishi, naweza kumuhendera kazi zaidi, ela simanya nitsambuleni! <sup>23</sup> Navwehwa pande mbiri. Nia yangu baha nifwe ili nikakale na Jesu, mana hiro ndiro nono zaidi kpwangu. <sup>24</sup> Ela kpwa fwaida yenu baha nienderere kuishi. <sup>25</sup> Namanya kpwa kpweli sindafwa sambu, ili nikuteryeni mzidi kumuadamira Mlungu, na kukala na raha kpwa sababu ya kumkuluphira. <sup>26</sup> Phahi nchedza kpwenu tsona mundakala na sababu kulu ya kumtogola Masihi Jesu kpwa higo arigonihendera.

<sup>27</sup> Ra muhimu zaidi ni muhende viratu ziambavyo habari nono kuhusu Jesu Muokoli. Phahi nkedza, nkasakpwedza, bado mino

nindasikira kukala mwadina chilume na roho mwenga. Nindamanya kukala munahenda kazi phamwenga na chadi, ili anjina nao aamini habari nono kuhusu Jesu. <sup>28</sup> Msiogophe atu ambao anakupingani. Kusaogopha kpweni ni dalili ya wazi kukala atu hinyo andaangamizwa, ela mwimwi mundaokolwa. Mlungu mwenye ndiye agahendaye. <sup>29</sup> Mana wakuphani nafwasi ya kumkuluphira Jesu na wakati wanjina kugayiswa kpwa sababu ya kumkuluphira. <sup>30</sup> Mwaniona nagaya hipho mwandzo, na bado mcheresikira kuhusu tabu zangu. Phahi namwi ni lazima mgaye dza vivyo.

## 2

### *Kalani a pole dza Jesu*

<sup>1</sup> Enehu mwamkuluphira Jesu naye anaku-tiyani nguvu. Nayo mendzwaye inakuhendani muoneto. Isitoshe, munashirikiana na Roho Mtakatifu kpwa kumendzana na kuonerana mbazi. <sup>2</sup> Kpwa vira ni hivyo, phahi gbwiranani mkale chitu chimwenga ili nami nikale na raha tsetsetse. Mendzanani na mkale na moyo mmwenga mosi bu. <sup>3</sup> Msishindane na apinzani enu wala kuhenda ngulu, ela kalani a pole na ayawenu muaone muhimu kuriko mwi enye. <sup>4</sup> Chila mmwenga naasilole mam-boge bahi, ela piya ni lazima adzishuulishe na mambo ga ayae.

<sup>5</sup> Ni lazima muririkane mambo gosi dza vi-ratu Jesu Muokoli vyokala achiririkana. <sup>6</sup> Hata

dzagbwe Jesu kala ana asili ya Mlungu, ela kayagbwirira phapho pha kukala a sawa naye. <sup>7</sup> Ela badala ya hivyo wakubali kuricha vyosi na kukala kama mtumishi. Wavyalwa dza swiswi na achikala na umbo ra mwanadamu. <sup>8</sup> Wakala mpole na kumuogopha Mlungu hata achifwa chifo cha waibu kpwa kukotwa misumari Msalabani. <sup>9</sup> Kpwa hivyo Mlungu wamuika phatu pha ishima kulu sana, na achimupha cheo chikulu kuriko vyeo vyosi; <sup>10</sup> ili kpwa dzina ra Jesu, chila vwindi ripigbwe, mlunguni, duniani na kuzimu; <sup>11</sup> na chila lilimi rindagomba kukala Jesu Masihi ni Bwana, kpwa utukufu wa Mlungu Baba.

### *Kalani mwanga duniani*

<sup>12</sup> Asena angu, kare huriphokalani phamwenga, kala mchimuogopha Mlungu dii yosi. Phahi sambi zidini kuhenda hivyo hata vivi ambavyo siphoo. Ni lazima mosi muhende chadi kumuogopha Mlungu kpwa wuoga na ishima, na kuhenda sawa kpwa atu ambao Mlungu waaokola. <sup>13</sup> Mana Mlungu ndiye ahendaye kazi mwenu mioyoni. Nkukuhendani muaze alondago na kuhenda kulengana na mpangowe. <sup>14</sup> Phahi, chila muhendaro, rihendeni bila ya kururumika wala kulumba, <sup>15</sup> kpwa atu asiambe kala mu ayi. Ni lazima muishi bila lawama tse. Mkale ana a Mlungu akalao dunia ya atu a kufyuka na a kumendza dambi. Mwimwi mundakala dza mwanga mng'ale jizani. <sup>16</sup> Ishini kulengana

na neno ra kureha uzima wa kare na kare, ili siku Jesu achiuya, nikale na ngulu dza mutu wa kushinda mairo na kazi yangu ikale taiyakala ya bure. <sup>17</sup> Mriphomkuluphira na kumuhumikira Jesu, vyakala kama sadaka mrizomupha. Mendzerepho mlatso wangu undamwagbwa phamwenga na sadaka hiyo.\* Ichikala hivyo hosi hundahererwani phamwenga. <sup>18</sup> Vivyo hivyo mwimwi namwi hererwani phamwenga nami.

*Paulo anapanga kuhuma  
Timothi na Epafrodito*

<sup>19</sup> Bwana Jesu achimendza, ndamhuma Timothi hiko kpwenu vi sambu sambu, ili wakati achedza hiku na habari zenu, zinitiye moyo. <sup>20</sup> Sina wanjina zaidi ya iye, ambaye anajali mambo genu chikpweli-kpweli. <sup>21</sup> Mana atu anjina osi anadzishuulisha na mambo gao, wala sigo gara Jesu Masihi alondago. <sup>22</sup> Hata mwimwi enye mnamanya Timothi arivyo mutu mzuri. Hwahenda kazi ya kutangaza habari nono kuhusu Jesu phamwenga, kama mutu na ise. <sup>23</sup> Phahi mara mwenga nchimanya higo ndigoniphaha, natumaini kumhuma, <sup>24</sup> nami ninakuluphira kukala Bwana andanihenda nedze ko kpwenu vi sambu sambu.

<sup>25</sup> Mwenehu Epafrodito ni muhendadzi-kazi na asikari myangu wa jeshi ra Bwana Jesu. Nriphotaka msada mwamhuma kpwedzanterya. Ela vivi nikaona ni muhimu auye kuko

---

\* **2:17** 2:17 Mara zanjina kala ichikala nyama analaviwa sadaka nkumwagirwa uchi.

kpwenu, <sup>26</sup> kpwa sababu anaaza sana kukuonani. Naye ana wasiwasi kpwa vira mwasikira ni mkpwongo. <sup>27</sup> Ni kpweli Epafrodito wakala mkpwongo hata achiamba afwe. Ela Mlungu wamuonera mbazi achimphoza. Na achinionera mbazi hata mimi piya, kpwa vira kayafwa siyaphaha utsungu zaidi ya hura nriokala nao. <sup>28</sup> Ndiyo mana naaza sana kumhuma, ili mumuone tsona na mkale na raha, na piya nisikale na wasiwasi. <sup>29</sup> Phahi mphokerenito na raha kama mfuasi wa Bwana Jesu. Atu dza hinya ni lazima muaishimu, <sup>30</sup> mana wahatarisha maishage kpwa kazi ya Jesu. Kala bado phadide afwe, kpwa kuniterya. Mana mwimwi kala mukure nami na tamuwezere kuniterya.

### 3

#### *Kumanya Jesu ni muhimu kuriko gosi*

<sup>1</sup> Phahi enehu, zaidi ya hivyo nakuambirani, hererwani kpwa sababu ya Bwana Jesu. Mino siona vibaya kukuandikirani mambo gago kpwa gago. Mana gandakulongozani mkaletu.

<sup>2</sup> Dzimanyirireni na hinyo atu ayi aambirao ayawao ni lazima mutu atiywe tsatsani kama shariya za Musa ziambavyo. Atu hinyo msiagbwire gao, ahendeni atu a koma. <sup>3</sup> Mana swiswi ndio atu a Mlungu kpwa kpweli. Huna muabudu kpwa msada wa Rohowe, tsona hunadzikarya kuhusu mambo hurigohenderwa ni Jesu Muokoli. Tahuadamira mambo gahendwago ni mwanadamu, wala tsatsa ya mwiri.

<sup>4</sup> Ichikala kuna mutu awezaye kuhendera



ngulu mahendoge kala ganaweza kumuokola, phahi angekala mimi. Kpwa kpweli mimi ninazo sababu za kukola kuamba hivyo. <sup>5</sup> Mino nátiywa tsatsani nriphomala sabaa mwenga. Chisha ni chivyazi cha Iziraeli, wa mbari ya Benjamini, nao avyazi angu ni Aeburania, yani mimi ni Mueburania mwenye-mwenye. Tsona, nálunga Shariya za Musa kulengana na mafundzo ga Mafarisayo. <sup>6</sup> Kulengana na hizo shariya za Chiyahudi kala nina haki, bila lawama tse. Phahi kala namendza sana kugayisa afuasi a Jesu.

<sup>7</sup> Ela mambo gosi nrigogaona ga mana, hipha sambi nagaona upuzi na tagana fwaida kpwa sababu ya Jesu. <sup>8</sup> Kpwa kpweli, chila chitu nrichokala nchihenda nachiona tachina mana nchifwananisha na samani kulu ya kumanya Masihi Jesu, Bwana wangu. Náricha vitu vyosi kpwa sababuye, na sambi naviona dza uchafu wa kutsupha dzalani. Maazo gangu ni nikale wa Jesu bahi, <sup>9</sup> na nigbwirane naye ngingingi. Sina haki yangu mwenye kpwa kulunga Shariya, ela nina haki kpwa kumkuluphira Jesu. Mana Mlungu anaapha haki atu amukuluphirao. <sup>10</sup> Nalonda nimanye vinono, chisha nimanye uwezo uriomfufula. Tsona nalonda nigaye dza vivyo arivyogaya iye, na nikale dza iye, hata ichikala ni kufwa, nifwe, <sup>11</sup> ili nami nifululwe.

### *Mairo ga kuwaniya kushinda*

---

**3:5** 3:5 a Arumi 11:1; b Mahendo 23:6; 26:5      **3:6** 3:6 Mahendo 8:3; 22:4; 26:9-11

<sup>12</sup> Siamba kukala nákala kare vira Mlungu alondavyo, aa sidzangbwekamilisha lengo hiro bii. Ela nawaniya kufika hipho, mana Masihi Jesu wanitsambula na analonda ni-hende hivyo. <sup>13</sup> Enehu, sidzitsukula kala nafikira lengo hiro, hata chidide. Ela chitu nihendacho ni kuyala ga kare na kuwaniya kuphiya mbere. <sup>14</sup> Phahi nazola mbere kushinda, ili niphahe zawadi. Mana wakati Mlungu achiniiha hiko dzulu andanipha za-wadi hiyo, kpwa kukala namkuluphira Jesu Muokoli. <sup>15</sup> Kpwa hivyo swiswi huriophera chiroho nahuazeni dza vivyo. Ela ichikala anjina anaaza tafwauti ya hivyo, Mlungu an-daang'aza matso. <sup>16</sup> Phahi chitu muhimu ni lazima hulungeni ukpweli hurio nao kare kuhusu Jesu.

<sup>17</sup> Enehu, nalonda mosi mwimwi muishi kuniiga mimi. Tsona phundzani sana atu ambao anaishi kulunga mfwano wa sawa hu-riokuonyesani. <sup>18</sup> Nákuambirani kano nyinji na vino nakuambirani tsona kuno nasononeka: atu anji anaishi kama maadui ga Jesu wala taajali chifoche msalabani. <sup>19</sup> Analongozwa ni tamaa mbii za miri yao, na kudzikarya na mambo ga waibu ahendago. Kazi yao ni kuaza mambo ga himu duniani bahi. Mwisho wao ni mohoni. <sup>20</sup> Ela swiswi hu enyezi a dzulu mlun-guni. Naswi hunamgodza Muokoli wehu kula mlunguni kpwa hamu sana, naye ni Bwana Jesu Masihi. <sup>21</sup> Andahumira uwezowe ambao unaweza kutawala chila chitu, ili agaluze hino

miri yehu minyonje ifwayo. Andaihenda kama mwiriwe wa ajabu ariouphaha bada ya kufufulwa.

## 4

<sup>1</sup> Enehu, nakumendzani sana na nina hamu ya kukuonani. Mwimwi mu zawadi ya kazi yangu na nina raha sana kpwa sababu yenu. Phahi asena angu dinani chilume mzidi kumkuluphira Bwana Jesu.

### *Paulo anaatiya moyo afuasi a Jesu*

<sup>2</sup> Sambu kuna gano magoma mairi yani Yodia na Sintike, ambao analumbana. Navoya ariche na akale na nia mwenga, mana osi ni a Bwana Jesu. <sup>3</sup> Phahi uwe mtumishi myangu muaminifu, nakuvoya uaterye hano achetu. Mana náhenda nao kazi ya kutangaza habari nono kuhusu Jesu, phamwenga na Kilementi na ahendadzi-kazi ayangu anjina ambao madzina gao gaandikpwa ndani ya chitabu cha uzima.\*

<sup>4</sup> Phahi chila wakati hererwani kpwa sababu mu a Bwana Jesu! Tsona nakuambirani, hererwani! <sup>5</sup> Chila mutu naamanye kukala mu a pole. Piya mmanyeye kala Bwana Jesu a phephi na kuuya. <sup>6</sup> Msihende wasiwasi kuhusu chochosi. Ela maitaji genu gosi mumvoye Mlungu, na mumshukuru kpwa chila chitu. <sup>7</sup> Phahi Mlungu andakuphani amani ambayo mwanadamu kaweza kuielewa. Amani iyo

---

\* **4:3** 4:3 Chitabu cha uzima: Ni chitabu cha Mlungu chiricho na madzina gosi ga atu ariotsambula.

naitawale mioyo na achili zenu kpwa sababu munamkuluphira Jesu Muokoli.

<sup>8</sup> Chimarigizo, enehu nakuambirani, achili zenu nazitawalwe ni mambo higa: mambo ga kpweli, ga ishima, ga haki, na mambo gasigo na lawama. Chila wakati azani mambo gahamirago atu, ga nguma nono, na mambo manono zaidi, ambago ganaweza kulikpwa ni atu. <sup>9</sup> Hendani chila chitu nrichokufundzani na mchikubali. Nakuambirani mambo manji na mchiniona nihendavyo. Sambu nalonda mlunge mfwano hinyo, naye Mlungu arehaye amani, andakurindani.

*Paulo anashukuru Afilipi  
kpwa misada yao*

<sup>10</sup> Namshukuru sana na kumtogola Bwana Jesu kpwa kukala mwayua kunishuulikiya tsona. Siamba kala mwaricha kunishuulikiya, aa ela ni vira kala tamuna nafwasi. <sup>11</sup> Tsona siamba hivyo kpwa sababu nina shida, hata, ela katika hali yoyosi mino nádzibaza kutosheka. <sup>12</sup> Namanya kuishi bila chitu, na namanya kuishi na vitu vinji. Nádzifundza siri ya kuishi hali zosi, kurya na kusaza, au kukala na ndzala, kukala na vinji au kukosa. <sup>13</sup> Mana naweza kuhenda chila chitu kpwa msada wa iye aniphaye nguvu. <sup>14</sup> Ela náonato mwimwi kugbwirana nami na kuniterya tabu zangu.

<sup>15</sup> Mwi Afilipi, mnamanya vira irivyokala mwandzo nriphoandza kutangaza habari nono kuhusu Jesu hiko kpwenu. Nriphouka jimbo renu ra Makedonia, ni mwimwi machiyenu ndimwi kala huchiteryana, mana mwanipha

msada wa pesa. Takuna kundi ranjina ra afuasi a Jesu ariohenda hivyo. <sup>16</sup> Piya nriphokala mudzi wa Thesalonike mwaniterya si mara mwenga si kano mbiri. <sup>17</sup> Siamba hivi kpwa nalonda mniterye, ng'ò, ela nalonda mphaha zawadi kpwa mbazi zenu. <sup>18</sup> Kpwa vi sambu enehu, nina chila chitu nilondacho, hata na zaidi. Mana náphaha vitu vyosi virivy-orehwa ni Epafrodito kula kpweni. Vitu hivyo ni dza sadaka ya kunukato, ambayo Mlungu anaikubali na inamhamira. <sup>19</sup> Naye Mlungu wangu andakutimizirani maitaji genu gosi na utajiriwe wa ajabu, kpwa sababu ya vira Jesu Muokoli arivyohenda. <sup>20</sup> Phahi enehu, Mlungu Baba wehu naatogolwe hata kare na kare. Amina.

<sup>21</sup> Niphozerani atu a Mlungu osi ario a Jesu Muokoli. Piya mkaphozwa ni afuasi ayangu ario hiku. <sup>22</sup> Atu a Mlungu osi hipha akakuphazani, hasa atu a nyumba ya Kaisari, Mtawala wa Chirumi.

<sup>23</sup> Navoya Bwana wehu Jesu Masihi akujaliyeni mosi.

**Digo**  
**Chidigo: Digo (Bible)**

copyright © 2019 Bible Translation and Literacy

Language: Digo (Chidigo)

Contributor: Wycliffe Bible Translators, Inc.

All rights reserved.

2020-11-24

---

PDF generated using Haiola and XeLaTeX on 21 Sep 2022 from source  
files dated 17 May 2022  
bab7eb71-e774-512d-9543-5878c28ca63b